


Brakes & Auto Parts

- WATERPUMP
- OVERHAUL
- WHEEL BEARINGS
- C.V. JOINT


SERVICE CENTER



BRAKE SYSTEM



SHOCKS REPLACEMENT



OIL CHANGE



CHASSIS PARTS

FULL SERVICE

TIMING BELT

CLUTCH KIT

MOTOR SUPPORT

PARADERA 143, TEL: 5883410 / FAX: 5883411 **OFFERING BEST CUSTOMER SERVICE**

Compania Vercas Aruba VBA ta gana su caso contra Gobierno den apelacion

Vercas Aruba VBA por participa den destaho publico pa Green Corridor

ORANJESTAD – Compania Vercas Aruba VBA representa pa mr. G. de Hoogd, a gana nan caso den apelacion. **BON DIA ARUBA** den combersacion cu mr. de Hoogd a confirma cu Vercas Aruba VBA, despues di a perde su caso sumario contra Gobierno di Aruba y Organizacion de Ingeniera Internacional S.A.(Odinsa), a apela esaki. Y ayera Hof a destrui e sentencia y a dicta sentencia na fabor di Vercas Aruba VBA. E caso aki ta relaciona cu e hecho cu Gobierno no a acepta a aplicacion di Vercas Aruba VBA (Vercas) pa participa den e destaho publico pa e Green Corridor. Gobierno a declara e aplicacion no valido pasobra aparentemente Vercas no a entrega e documentonan necesario den e termino stipula cu ta 17 September

2012 entre 10'or di mainta y 12'or di merdia. Vercas a entrega e documentonan 12.08 minuut despues cu 12.03 e representantenan di Vercas a presenta na DOW. Tambe ta un hecho cu dia 14 September 2012, via e-mail entre partidonan, Gobierno a notifica Vercas cu e crusada di Seroe Thijshi no ta forma parti mas di e proyecto Green Corridor. Esaki a pone cu Vercas mester a bay haci cambionan drastico den su calculacion. Partidonan durante tratamento di e caso den Hof, mesun cu Hof ta sali for di e punto di bista cu mester tene e ley di destaho publico estricto. Esey ta encera cu si entrega e documentonan un par di minuut laat esaki ta keda considera invalido.

EVALUACION DI HOF



Hof den su evaluacion ta muestra cu riba e pregunta con pa evalua e situacion aki, ta tene na consideracion cu e cambionan haci pa cu Gobierno den e proyecto, no tabata riba peticion di Vercas. Hof ta interpreta e correspondencia riba e-mail di dia 14 di September 2012 den careda di 10.32 di anochi, otro cu e Hues di Corte den Prome Instancia. Segun Hof, enberdad Vercas den su e-mail di 7 September 2012 a sugeri pa saca e crusada di Seroe Thijshi for di e "preworks" di e proyecto Green Corridor, pasobra esaki lo sobrepasa e suma di 5 milyon florin y ademas e lo no ta realisabel den e periodo cu Gobierno kier. Hof ta haya cu Gobierno a manda su cambio riba e "preworks" laat. Hof ta muestra cu ta 14 September 2012 pa 10.32 di anochi, for di orario normal di oficina, esaki ta sosode siendo cu e inscripcion pa e destaho publico mester sosode su dialuna cu ta nifica cu e cambionan di e cal-

culacionnan mester a sosode durante fin di siman. Esaki siendo cu Vercas ta un compania estableci na Colombia y tin solamente un representante na Aruba. Y Gobierno tabata na altura di esaki. Vercas a muestra cu e mester a laga tres colaborado bula bin Aruba pa traha. Y for di diasabra mainta tempran te cu dialuna 17 di September 2012 pa 5.15 di mainta a keda traha, pa haci cambionan drastico den e calculacionnan. Hof ta haya cu esaki ta un indicacion bon cla cu e cambio haci pa Gobierno, tabata un trabou enorme pa Vercas. Hof ta haya cu esaki ta trece cum'e cu Gobierno a dificulta pa Vercas por a logra entrega su documentonan na ora. Ta diabierna anochi 14 di September 2012 Gobierno ta notifica di e cambio y e documentonan mester keda entrega dialuna 17 di September 2012. Hof ta haya cu Gobierno, como esun cu a ofrece destaho publico, lo mester a haci e periodo di entrega documen-

tonan mas largo. En todo caso duna Vercas mas tempo. Hof a bisa cu Vercas a muestra cu den e proyecto Green Corridor, anterior Gobierno a haci periodonan mas largo y no tin mas participante banda di Vercas y Odinsa.

Hof a muestra tambe cu durante tratamiento di e caso a sali na cla cu Vercas a nega di tuma su documentonan bek na DOW, y cu desde 17 September 2012 esakinan ta warda den un caha fuerte di e notario Yarzagaray. Den e situacion aki, ta imposibel cu Vercas lo por a adapta su documentonan na esunnan di Odinsa.

Hof a rechasa e ponencia cu lo por tin falsificacion di documento.

Hof ta haya, teniendo cuenta cu tur loke a sosode, cu aki e descualificacion di Gobierno pa e documentonan di Vercas pasobra nan a keda entrega laat, no ta valido. Hof ta haya cu e hecho cu e documentonan ta den caha fuerte di e notario Yarzagaray, no mester bin un calculacion di nobo.

SENTENCIA

Hof ta destrui e sentencia di Corte den Prome Instancia y ta ordena Gobierno pa dentro di dos dia despues cu e sentencia ta valido, Gobierno considera e oferta di Vercas valido. Hof ta ordena Gobierno bay tuma e documentonan di Vercas cu ta warda den e caha fuerte di notario Yarzagaray y evalua esaki.

Hof a fiha un daño perjuicio di 10 mil florin pa cada dia cu Gobierno keda sin cumpli te na un maximo di 500 mil florin.

Hof a ordena Gobierno y Odinsa pa cubri e gastonan di e caso na banda di Vercas. Cu e sentencia aki, Gobierno ta hay'e awor den e situacion cu e mester acepta e oferta di Vercas pa cu e destaho publico di Green Corridor. □